

愚

齋

存

稿

愚齋存彙卷第十六目錄

奏疏十六

請設江皖籌振公所並籌墊振款辦法摺

報効振款暫請准獎實官片

請飭部墊款解濟振需片

請印新捐實收並刊用關防片

補授郵傳部尙書謝 恩摺

撥解江皖振款情形摺

請調劉鍾琳隨辦江皖振務片

遵 旨覆查官辦鐵路被參各款摺

愚齋存彙

卷十六 奏疏目錄

一 思補樓藏版

請撤梁士詒差使片

請裁圖書通譯局及交通研究所片

京漢鐵路需還官項擬訂正金銀行借款合同摺

官紳報効災振鉅款請予優獎摺

續撥皖省振款情形片

請援案緩徵江北災重各州縣本年上忙丁漕摺

請免振糧釐稅片

擬定美英德法四國銀行借款合同摺

各省官紳報効振款仍請照案優獎摺

士民捐助振款請予建坊片

簡授郵傳部大臣謝 恩摺

愚齋存稿卷第十六

奏疏十六

請設江皖籌振公所並籌墊振款辦法摺

宣統二年十月

奏爲江皖災重擬請設立籌振公所一面借墊鉅款趕放急振以甦民命恭摺仰祈

聖鑒事竊

臣

准度支部咨宣統二年十一月初九日軍

機大臣欽奉

諭旨陸潤庠等奏江皖大災情形急迫請特派大員籌辦振務一摺著照所請該部知道欽此

臣

跪聆之餘莫

名惶悚伏讀原奏內稱災區延蔓千數百里災民數十

百萬天寒糧盡死亡枕藉盛宣懷辦振三十餘年各省
偏災無不往振若蒙

簡命爲籌振大臣於振務必有益並令籌墊巨款迅
派義紳馳往災區趕放急振等語仰承

俞允具見我

皇上廑念災區有加無已之至意凡屬臣民同深欽感
臣維皖北江北各州縣素不講求水利以致民不聊生
光緒三十二年秋間徐淮海等處被災皖北一帶同遭
荒歉良由壤地相接瘠苦相同而民俗習爲強悍匪類
遂多出沒皆地勢使然也故籌振卽所以籌撫弭災更

急於弭亂未可輕易視之第近年來天災流行層見疊出

朝廷截漕發帑無不立沛恩施督撫議振議蠲亦無不竭盡心力無如財源困乏庫藏旣因此而愈絀勸募亦因此而更難臣辦振以來自矢血誠不遺餘力從前官振不足尙可以義振輔之今則上海等處商務敗壞財政困難官義兩振同爲束手臣受

恩深重義不容辭此次皖災先經撫臣朱家寶電商卽將經辦滇捐溢收之二萬五千餘兩暫撥皖振並電商督臣張人駿擬將海州當地之款收回後亦留爲皖用

並電令上海紅十字會紳董沈敦和等美國洋員福開森等開會勸辦華洋義振茲兩省官紳合詞籲請奉

命籌辦

臣

卽自顧衰庸更當盡力圖維以期稍資補助

夫籌振必先籌款原奏內稱凡現在准辦各項振捐及

臣

大化

臣

長信所奏俟部議准後悉以隸之又稱如捐

銀千兩者許建坊捐銀萬兩以上者請獎實官凡可推

廣者悉准條議具奏等語

臣

查新定捐章限制甚密勸

辦每虞掣肘擬請商之部

臣

凡有益於振務者但期不

滋流弊暫准酌量變通已另片詳細附陳以爲集腋成

裘之計然此皆籌款之策而非救急之方

臣

愚以爲時

屆隆冬飢寒交迫急不能待春麥不收爲時尤久江皖
兩省災黎倘俟以上所言籌有的款再往拯救行將盡
爲餓殍且恐有鋌而走險者釀生事端所糜更鉅迭接
皖紳電稱皖北奇災廣十五州縣飢民達二百五十萬
人又據皖省京官石長信等十七人同來臣寓面稱皖
南六屬圩岸亦有沖決懇爲一律籌放撫臣來電亦請
寬籌兼顧江北紳士來電其數亦過百萬臣查丙午年
徐淮海災區僅止一隅尙須振款四百餘萬此次兩省
合計地廣人多雖竭力查明先儘極貧拯救亦非多籌
鉅款恐不足以敷冬春兩振再四思維苦無良法惟有

商請部臣先行設法提借並向度支部之大清銀行郵傳部之交通銀行及臣所辦之通商銀行設法息借總須湊集現銀一百萬兩尅期匯撥方能濟急將來卽以所擬籌捐之法陸續接濟並次第歸償一面由查振大臣馮煦親詣各災區詳細查勘就近督飭各處員紳官振義振合爲一氣分別按查極貧次貧戶口趕放急振並體察地方情形或應購糧平糶或應援案當田或應設立粥廠務於兩三月內迅速籌辦庶可下澹沈災上紓

慈廛除由臣咨商部臣暨江皖督撫臣妥籌辦理外擬

請

飭下度支部郵傳部轉飭各該管銀行遵照借墊刻期
匯兌以免貽誤臣爲江皖兩省災情奇重必須趕放急
振起見所有擬請先籌墊款緣由是否有當謹恭摺具
陳伏乞

皇上聖鑒訓示謹

奏 本月初四日奉

諭旨盛宣懷奏江皖災重擬請設立籌振公所各摺片
均著照所請該部知道欽此

報効振款暫請准獎實官片

宣統二年十二月

再此次江皖災深地廣實非寬籌振款斷不足以資拯

救部

臣疆臣

同處款絀用繁之日竭力籌維一時亦難

設措而捐務勢成弩末部定新章理應遵守第念數百萬生靈得之則生勿得則死似不得不變通推廣爲目前救急之計約有數端謹詳陳之

臣

查現在各省振捐

年復一年再三請展而究其急振已經辦過有如順直山東吉林福建江西各省新舊振捐應令權其緩急暫行停止俟此次江皖災振過後不妨再行續辦從來捐務歸一來源或可稍暢又查通行捐章惟虛銜封典貢

監餉枝及七項常捐向准外辦其十成貢監捐免保舉
補交留省等項均歸部收擬請援照光緒三十三年江
南成案暫准江皖籌振公所專辦六個月又查向章捐
銀一千兩者許建坊捐銀一萬兩以上者獎實官近來
物力艱難迥非昔比況官制議改在即士民益形觀望
若必欲捐銀一萬兩以上方准報効能有幾人擬請如
有實銀五千兩以上者亦可准其報効惟請獎實官皆
須照籌餉例實銀有盈無絀較之從前減成折數實增
數倍又查報効振款例得專摺從優
奏獎但必須欽奉

俞允一經交議部臣卽未便照准同一報効鉅款而或准或駁尤不足以昭公允擬請

俯念目下籌款之難待振之急若非萬不得已斷不敢冒昧籲求所有收到實銀或一萬以上或五千以上得以專案

奏獎者必不多人應懇一律

特沛恩施以彰激勸或謂鉅款雖救民命實官有礙吏治夫吏治之壞豈盡關乎此部臣疆臣果能以激濁揚

清爲已任賢者用之不肖者去之何礙之有以上所請各節皆屬急切辦法擬請將各項捐款統歸江皖籌振

公所照章核收由臣分別

奏咨請獎一面請頒部照轉發領換仍俟捐有成數歸墊清訖概行停止以重名器該省被災已久民生已飢疲力盡既蒙

皇上不次之恩實難再緩須臾除俟奉准後由臣先向

各銀行設法借墊並會商前撫臣馮煦趕緊振濟外合

無仰懇

天恩俯允所請飭部照准災黎幸甚地方幸甚是否有當謹附片

奏陳伏乞

聖鑒訓示謹

奏

硃批恭載正摺後

請飭部墊款解濟振需片

宣統二年十二月

再此次兩省災情經外國教士等前往查視指爲甚重
已在上海開會籌辦洋振又接皖撫臣朱家寶來電華
洋義振會報告有教士先籌借十萬散放似宜量爲酌
撥次重災區以示公道等語查洋人向來振濟以爲非
按日計口給糧不足救活與其少給仍行餓斃不如救
一人是一人其成見如此臣從前在滬曾派華員到會
卽名爲華洋義振並派華員會同查放此次既有洋振
雖多少之數尙不可知然豈有本國百姓本國官長淡
漠視之聽其轉輾溝壑尙不及外人之急切者臣焦思

數日寢饋不安與前安徽撫

臣

馮煦及上海義振會張

士珩沈敦和等往復籌商幾至束手今於萬分急切之

中乃有千慮一得之想查撫

臣

袁大化御史石長信所

奏世職開復兩項爲籌振最新之策現經部議由部核
收俟集有成數隨時撥給災區濟用此項新章與尋常
捐輸不同諒可踴躍惟必俟籌集成款再行撥用必致
緩不濟急擬請由度支部先行挪墊卽以捐項歸還方
可應急又

臣

部奏准由河南省之開封鐵路接造至江

蘇省之徐州海州名曰開徐海鐵路已派員總辦開造
在卽正當江北被災之地如先撥款項日後以工抵振

或作爲當地之需亦可稍助振務惟路款必須

奏明辦理

臣

維捐款有著部墊不難歸償至以本處路

款暫借振用挹彼注茲扣還亦必有把握民爲邦本

聖主以民命爲重部

臣

仰體

慈懷自應通融籌助擬請

天恩飭下度支部預墊捐款銀三十萬兩郵傳部暫借
路款銀三十萬兩分別迅解災區妥爲散放庶不致爲
外人所輕視而待斃飢黎愛戴

皇仁尤無旣極是否有當謹再附陳伏乞

聖鑒訓示謹

奏

硃批恭載正摺後

請印新捐實收並刊用關防片

宣統二年十二月

再查各省開辦振捐均係由藩司刊發實收先行填用再換部照現查江南振捐早經停辦皖省甫經奏准似未便以皖省捐款撥歸江北振用

臣奉

命籌辦兩省振務應卽通力合作不分畛域且由臣經手向銀行等處籌墊借款似應由臣收捐歸還方足以昭信實擬請由臣另行刊印實收名曰江皖兩省籌振新捐卽在京城設立公所上海等處設立分所派員勸辦以清眉目至此項實收及咨行文牘均應蓋用關防並擬請刊刻木質關防一顆文曰

欽命籌辦江皖兩省振務大臣關防俾彰信用謹再附
片陳明伏乞

聖鑒訓示謹

奏

硃批恭載正摺後

補授郵傳部尙書謝

恩摺

宣統二年十二月

奏爲恭謝

天恩仰祈

聖鑒事竊

臣

於宣統二年十二月初六日欽奉

上諭郵傳部尙書著盛宣懷補授欽此自

天聞命伏地滋慚竊念

臣

於本年七月間仰承

恩簡飭赴郵傳部右侍郎本任並兼幫辦度支部幣制事宜數月以來涓埃未報迺蒙

寵命補授尙書自顧疎庸彌深惶悚查郵部爲交通要區而於全國財政中外利權實相維繫辦理稍未得宜

損失實難臆計四政尤以路郵爲繁重各省鐵路官辦商辦俱未能悉臻完善郵政雖奏歸本部至今尙未收回凡本部缺憾之端皆微臣疚心之事臣於路電輪船均經手創辦但今昔情形迥不相同自非不避嫌怨力任鉅艱恐難振全部之精神冀交通之盡利臣年力衰邁深懼勿勝祇以受

恩深重顧茲時局危難不敢自耽安逸惟有勉竭駑駘盡一分心除一分弊以期仰荅

高厚鴻慈於萬一除隨時隨事與左右侍郎和衷商榷

認真整頓外所有

微臣

感激下忱謹恭摺叩謝

天恩伏乞

皇上聖鑒謹

奏 本月初七日奉

硃批知道了欽此

撥解江皖振款情形摺

宣統二年十二月

奏爲恭報撥解江皖兩省災區振款業已迅速匯兌趕辦急振恭摺仰祈

聖鑒事竊

臣

於宣統二年十二月初四日欽奉

諭旨盛宣懷奏江皖災重擬請設立籌振公所各摺片均著照所請該部知道欽此查

臣

原奏內請

飭度支部預墊捐款銀三十萬兩郵傳部暫借路款銀三十萬兩並飭各該管銀行及

臣

所辦之通商銀行設法息借等因仰蒙

俞允率土臣民同深感戴

臣

於數日間迭准查振大臣

馮煦電稱災地寬廣饑民載道現值隆冬凍餒斃命者日不知凡幾困苦情形目不忍觀而民俗强悍深恐流而爲匪待振實爲急迫臣奉

旨後卽經商之度支部

臣

將預墊捐款之三十萬兩及

臣部暫借路款之三十萬兩分別飭由大清銀行交通

銀行尅期撥解並飭

臣

所辦之通商銀行先行墊借二

十萬兩其計銀八十萬兩一併匯交現設駐甯江皖振務轉運局兌收由浦口鐵路分起轉解一面電商查振大臣馮煦分別輕重兌換銀幣銅幣迅撥災區責成各員董趕緊查放以期早到一日早救數百萬生靈一日

之命卽以仰副我

皇上子惠元元之至意除遵設籌振公所分派委員開辦各項捐輸接濟振需並籌還借墊各款外所有趕緊撥解江皖災區振款情形理合先行恭報上紓

宸厯伏乞

皇上聖鑒謹

奉 本月十二日奉

諭旨籌辦江皖振務大臣盛宣懷奏撥解江皖兩省災區振款趕辦急振一摺知道了欽此

請調劉鍾琳隨辦江皖振務片

宣統二年十二月

再辦振固以籌款爲難得人尤屬匪易

臣

查丙午年徐

淮海被災前兩江督

臣

端方會商

臣

遴派劉鍾琳魏家

驛等分赴災區總司稽查深資得力此次江皖振務地

方更較遼濶雖經派有員紳分投查戶然災民太眾集

款不多欲求毋濫毋遺尤須審查確實在已電商督

撫諸

臣

仍照丙午年辦法官義併放以免軒輊但非有

熟悉振務人員往來稽查恐難絲絲入扣查魏家驛已

赴滇南劉鍾琳現任法部參議廳參事兼充鹽務處差

使該員心細才長勇於爲善經查振大臣馮煦及上海

義振公所張士珩等往返電商擬請仍調該員迅速馳往皖北江北隨同馮煦贊助通籌分途查察俾受振災黎均沾實惠合無仰懇

天恩准將劉鍾琳調辦江皖振務免扣資俸出自鴻施謹附片具陳伏乞

聖鑒訓示謹

奏 本月十二日奉

諭旨盛宣懷片奏請將劉鍾琳調辦江皖振務免扣資俸等語著依議欽此

遵 旨覆查官辦鐵路被參各款摺

宣統三年正月
郵傳吳會奏

奏爲遵

旨查明官辦鐵路被參各款先行覆陳恭摺仰祈

聖鑒事宣統二年十二月初六日承准軍機大臣字寄
奉

上諭有人奏郵傳部官辦鐵路濫借濫費懇及時飭查
整理一摺著盛宣懷吳郁生按照所奏各節確切查明
認真整頓該部所有每年收支出入款項通盤澈查有
無弊端據實奏明一面咨明度支部查照以裕國用原
摺並著鈔給閱看欽此遵

旨寄信前來臣等按照原奏於各路員司款項分別飭查詳加覆覈謹將查明各節爲我

皇上陳之原奏稱聞郵傳部借款新借不暇造路徒以墊舊借虧耗等語一節查郵傳部新借款如汴洛續借一千六百萬佛郎爲接築汴洛路工之用匯豐匯理借四百萬鎊爲收贖京漢之用又一百萬鎊爲興辦工藝實業之用滬杭甬借款一百五十萬鎊分別轉借蘇浙公司並仍存銀行尙未提用新奉一半借款日幣三十二萬元爲改築遼河以東路工之用吉長一半借款日幣二百十五萬元爲修築吉長路工之用均經奏明在

案以上各款實係用在路工並非賠墊息耗原奏稱官辦十路除京張外皆涉外款以京奉京漢爲最長歲入共二千萬外除四成作養路折舊尙餘一千餘萬以各路借款折扣息耗之重均取償於兩路所餘遂苦入不敷出一節查國家造路不得已而借款卽不能不認折扣息耗至已成之路多有入不敷出非藉兩路所餘以資挹注勢必續借以償受虧尤甚是以統籌協濟未爲失策惟京奉以防疫停車本年運費損失所短恐不止百萬以外原奏稱津浦一借續借南段續借北段又續借明扣而外另加小二五扣酬勞等名目一節當經咨

詢督辦津浦鐵路大臣據覆稱津鎮草合同擬借英金七百四十萬鎊路綫合一千八百餘里嗣經督辦大臣袁世凱等訂立津浦正合同定浦口路綫加增三百餘里估款約英金九百萬鎊因直隸山東江蘇安徽奏設四省公司招股預備贖路并聲明借款不敷由路股撥用是以祇借英金五百萬鎊按照合同係九三折上年南北段造送全路應需估單切實核減除原借款悉數撥付外實不敷三千二百六十餘萬兩約合英金四百十餘萬鎊加以折虧及還利費用應借虛數英金四百八十萬鎊經奏明循案續借原借係九三扣每年付還

借款之本利德華匯豐銀行於每百兩計收用銀二錢五分作爲經理費用所謂小二五者亦照前合同辦理又原借應提餘利十分之二改由頭次發售債票項內提留二十萬鎊所謂酬勞續借款合同已將此款刪去等語覆核來咨似於原擬辦法及借款合同尙無出入原奏稱梁士詒旣任丞參又兼鐵路局長又兼交通銀行會辦其弟又廣東交通銀行總理又安置盧祖華爲京奉總辦兼津浦總辦弟盧家驥爲北平輪船買辦魏熾爲京奉稽查不到差而支薪塘沽學習站長龍建章戚也坐支乾薪死且撫卹一節查

臣

部奏定交通銀行章

程總行派總理一人協理一人另派管理鐵路人員爲
幫理使款項互相關顧不至有所牽掣梁士詒卽兼充
幫理廣東分行總辦之下有經理一員前由銀行總理
請派梁士訐充當盧祖華由京奉路繙譯升提調升總
辦兼充津浦總辦旋即辭差該員雖在京奉有年惟身
弱多病能否勝任尙待察看盧家驥充北平輪船司事
並非買辦魏熾查無其人塘沽學習站長陳瑞麟月修
二十五元病故後酌照成例給卹三月計七十五元爲
數無多亦常有之事原奏殆卽指此又稱各站有正副
站長替站長額外站長學習站長有總稽查分稽查學

習稽查有總管學習總管有車務長學習車務長有調用電報生自用電報生一節查京奉用人較多時有增減惟現在查無額外站長學習總管車務長學習車務長調用電報生自用電報生等各名目原奏稱合同外之洋員添用副總管斯諦利樂克莫斯又工程洋員多名或掛名乾修或兼差津貼或藉外便私從前留備折舊及每歲所餘折舊概烹分爲紅利一節查車務副總管楊昌齡辭差三十三年始添派斯諦利接充原奏之樂克當卽勞柯呵悌專司客票莫斯當卽馬賽充總帳房文案工程洋員最多時有二十一員現有十九員管

理修路養路尙未多添至掛名乾修兼差津貼已經裁撤當再飭總辦嚴行考核毋任濫厠至折舊一項查新河材料廠用剩器械減價售出列入雜收項下又每歲抽換舊道木由洋工程司減價變賣均經列入雜收似無烹分情事原奏稱成部四五年祇成三十三年一次統計表按表京漢變故三百六十五次本年新鄭碰汴洛車大智門碰貨車一月屢出大險一節查統計表經憲政編查館奏明以光緒三十三年爲第一期現正趕造三十四年分表冊與各部一律辦理表載三十三年京漢變故三百六十五次比京奉增五倍但京奉凡遇

車隊妨害臨險救止等細故皆不列入變故京漢將此
二項計二百零六次一併列入表中且京漢路綫較長
當時工程新竣河橋山洞窄坂峻坡頗多險處變故之
多實由於此宣統元年減至二百九十三次上年車務
總管易人後約祇一百九十次業已漸減去冬十月新
鄭碰車蓋與住站京漢貨車相碰並非碰汴洛車大智
門車站孝感票車出軌傾覆行李車一輛未傷人亦未
碰車所謂一月屢出大險當卽指此業經隨時將車守
司機等員分別懲撤並飭各路嚴定賞罰謹慎從事原
奏稱行車銷費京奉費煤七萬八千四百七十噸零價

止二十七萬八千八百數十兩京漢路多而少費七千餘噸價五十六萬九千八百元零以銀折洋增三分之一一節查三十三年統計表所列兩路費煤及價值誠如原奏所開之數驟觀似屬駭聞但車行用煤之數應與車行里程互相比較不應以路之長短爲比較應以車行次數之多少爲定也攷京奉路雖短是年車行里程合七百八十四萬餘里京漢路雖長是年車行里程合六百五十八萬餘里勻計京奉車行一里費煤約千分噸之十京漢車行一里費煤約千分噸之十一是京奉似多而實少京漢似少而實多至其價值京奉就近

購自開平其價較賤京漢北段購自唐山臨城豐樂南
段購自林西萍鄉道遠價貴加以本路運費裝卸費各
項故與京奉不同且機車有省煤費煤之別車行有重
載輕載之分煤質有純駁優劣之判兩路斷難強爲比
例以上各節皆係查明實在情形竊維路政漸興款由
息借冗員濫費首貴剔除臣等到任後擬先於本署用
人用財等處實事求是力加整頓而徐及於各路以期
擴清積弊有裨財政冀不負

朝廷委任之意除鐵路局圖書通譯局辦法另行附片
具陳外謹將遵

旨查辦事件據實復陳伏乞

皇上聖鑒謹

奏 本月二十四日奉

諭旨盛宣懷等奏查明官辦鐵路被參各款一摺著度支部知道又片奏請將梁士詒撤銷鐵路局局長差使及交通銀行幫理兼差等語又片奏請裁撤圖書通譯局及交通研究所等語均著依議欽此

請撤梁士詒差使片

宣統三年正月

郵傳吳會奏

再臣部左參議鐵路局局長梁士詒初隨前署尙書唐紹怡辦理鐵路先派五路提調逮臣部奏設鐵路總局梁士詒卽經奏請

派充局長平時任事勇往款項悉歸其動撥路員聽命於一人遂不免有把持之名致煩

聖厯應請撤銷鐵路總局局長差使及交通銀行幫理兼差其經手路局銀行款項歷年旣久頭緒繁多現奉諭旨飭將所有每年收支出款項通盤澈查有無弊端臣等遵查該總局雖有季報而路政司會計科均不

經由稽覈故非倉猝檢查簿計所能究其根柢該局管理委員呈閱帳冊亦不完全現擬暫設清查款項處嚴其關防寬其時日遴派精於會計者數人調齊路局銀行各項帳目及歷來收支出憑據逐一核對其不明白者隨時責成該員聲復方能界限畫清水落石出有無弊端自當據實奏明決不敢絲毫袒護亦不能預存成見至臣部原奏以立法司法之事屬之路政司而行政之事歸之鐵路局並聲明外人借款交涉機要部臣或有不便直接之處是以仿照日本設局辦理等語諒因本部有實行營業性質與曩日六官成例僅有司法

而無行政迥不相同今之議者謂路局未免專權糜費
似宜撤局留司以符舊轍惟念路政之外尙有郵電均
係仿照東西各國設局綜理卽輪船商股商辦在上海
亦有招商分局四政四局天然成立按之事理恐將來
礙難一起撤銷至於裁節浮糜要在用人簡當防維專
擅要在權限分明否則局糜費司亦可糜費也局擅權
司亦可擅權也臣等再四思維事非實在經驗難窮其
利弊卽難定其因革擬暫由臣等親自督飭該司局人
員認真整頓署侍郎臣李經方洋務久經歷練凡有各
國交涉以及駕馭洋員當可協商妥慎經理所有該局

人浮於事一面分別汰留不久郵政收回容再統籌四
政或宜裁局併司抑竟改差爲缺屆時各部官制如有
規模自可察酌情形妥擬章程請

旨定奪總之

臣

部人材務實不務虛欲期勝任本非容

易似祇能爲地擇人萬不能爲人擇地

臣

等值才難款

絀之時力加裁節謗必隨之但時事日亟財政日難苟
徇私情必誤公事不得不凜遵

面諭破除情面認真辦理一俟清釐整飭稍有頭緒再
當據實奏明一面分別造冊咨明度支部查照是否有
當謹附片陳明伏乞

聖鑒訓示謹

奏

諭旨恭載正摺後

請裁圖書通譯局及交通研究所片

宣統三年正月
郵傳吳會奏

再臣部於光緒三十三年奏設圖書通譯局分譯各國

船路電郵規則章程嗣經升任尙書臣徐世昌奏將該

局釐定職掌試辦交通研究所復奏擬訂船路電郵四

政專律揀派游學畢業生爲起草員統歸參議廳編覈

科辦理並奏派升任僉事陳毅總司纂核歷經分辦在

案臣等查編律各員都係熟習洋文而四政所取資亦

必廣搜羣籍融會中西兼譯歐美之書詳究交通之故

似與圖書通譯局所辦之事本歸一轍而又較爲切要

原奏所云該局行走人員誠不爲少且廳局分立迹近

駢枝今擬酌量歸併以期統一凡圖書收掌責諸編覈
科通譯事宜任諸起草員所有圖書通譯局及交通研
究所應卽裁撤其調局人員另候委用俾昭核實而省
繁複是否有當伏乞

聖裁訓示謹

奏

諭旨恭載正摺後

京漢鐵路需還官項擬訂正金銀行借款合同摺

宣統三年

二月 度支部會奏

奏爲京漢鐵路需還度支部官項擬定正金銀行借款合同恭摺會陳仰祈

聖鑒事竊自光緒三十四年九月間郵傳部因收贖京漢鐵路借用度支部官款規平銀五百萬兩年息六釐分七年攤還前二年還息不還本嗣後應還本息由京漢鐵路餘利項下籌付當經會同度支部奏明奉

旨依議欽此查郵傳部本應遵照奏案分作五年拔還而度支部已將前項撥歸海軍部爲購船之用茲准海

軍部咨商所買船艦本年秋後即可陸續回華所有郵
傳部應撥還贖路款項五百萬兩卽須提前撥交度支
部轉撥本部以應急需前來惟查京漢鐵路餘利斷難
一起提撥再四會籌祇有借債還債之一法適值橫濱
正金銀行來部面商借款磋議匝月擬定合同十五款
其大要係借日金一千萬圓由郵傳部出給小票年息
五釐九五扣以二十五年爲期自第十一年起每年抽
籤還本售票第十年後無論何時中國願將未到期股
本全還或額外多還若干均可照辦但須每日金一百
圓給付日金一百零二圓半第二十年以後仍照票面

之數交款其應還本息悉由郵傳部京漢餘利項下支
付如不敷全還本利之數則以別項補足等語度支部
查向來借款均由臣部指定餉源作保茲查有江蘇漕
糧折價一百萬兩可作爲此項借款頭次抵押各等語
臣等綜核合同大旨與光緒三十四年奏准贖回京漢
鐵路所訂匯豐匯理銀行借款合同相同所有此項借
款一千萬圓除歸還度支部銀五百萬兩約尙餘銀三
百萬兩左右現值各處鐵路還本還利需款孔多應由
郵傳部收入統計正項以應急需除將合同擬稿咨明
外務部查核謹繕具議訂合同十五款清單恭呈

御覽應否由郵傳部

臣

簽字蓋印請

旨遵行恭候

命下

臣

部並分咨外務部及出使日本大臣一體欽遵

辦理所有擬訂正金銀行借款合同緣由謹恭摺會陳

伏乞

皇上聖鑒訓示再此摺係郵傳部主稿會同度支部辦理合併聲明謹

奏

本月二十三日奉

官紳報効災振鉅款請予優獎摺

宣統三年二月

奏爲官紳報効災振鉅款照章專摺

奏請優獎以重振需恭摺仰祈

聖鑒事竊臣奉

命籌辦振務當以災深地廣非寬籌振款不足以資拯救請將捐務變通推廣凡報効一萬兩以上及五千兩以上者均得援例從優

奏獎並聲明必須仰邀

俞允一經交議部

臣

卽未便照准應懇一律

特沛恩施以彰激勵等因宣統二年十二月初四日欽

奉

諭旨均著照所請該部知道欽此欽遵在案茲查有三品銜候選郎中劉承幹報効振捐銀一萬五千兩武備院卿銜

頤和園員外郎連吉二品封典在任候選知縣長洲縣學教諭唐錫晉指分安徽補用知縣顧潤章二品封典三品銜候選郎中葉韶奎福建試用鹽大使徐家樹各報効振捐銀一萬兩二品廕生通判用田兆馨監生錢承俊附貢生朱椿各報効振捐銀五千兩共計報効振捐銀八萬兩均已如數核收由籌振公所稟報前來

臣

查江北皖北兩省災區已屬地廣人眾嗣又奉

旨兼籌豫振近則直隸東三省防疫借款亦由部議歸併江皖新捐展期收償屈計辦振防疫需款者五行省不特振務尙無告竣之期亟應隨時接濟而辦振之墊款防疫之借款均欲取給於區區新捐之中已不下三四百萬兩其有待於各省官商紳富慨捐鉅資源源解助者譬如大旱之望雲霓情更切迫今該員等或毀家紓難好義情殷或迭次輸將樂善不倦雖均稱不敢仰邀獎敘若不照章從優

奏請殊不足以彰善舉而策將來查劉承幹前於海州

工振曾助鉅款茲復報効銀一萬五千兩核與光緒二十七年間郎中邢傳經捐振一萬兩獎給四品卿銜一案數逾半倍擬請

賞給四品卿銜連吉原有武備院卿銜係屬三品如報捐二品頂戴例銀僅五千四百兩現經報効銀一萬兩擬請

賞給二品銜唐錫晉歷辦義振數十年成勞昭著願潤章歷年勸募振捐爲數甚鉅現各報効銀一萬兩核與報捐雙月選用道員例銀有盈無絀均擬請以道員候選葉韶奎上年捐助鄂振銀一萬兩經前護湖廣督

臣

楊文鼎

奏交部議另行核獎現又報効銀一萬兩共計二萬兩核與報捐道員加二品頂戴例銀有盈無絀擬請以道員候選並加二品頂戴徐家樹上年捐助楊鎮沙洲振銀一萬兩經兩江督

臣張人駿

奏交部議另行核獎現又報効銀一萬兩共計二萬兩核與報捐不論雙單月指分知府例銀有盈無絀擬請以知府仍留原省補用田兆馨錢承俊朱椿等三名各報効銀五千兩核與報捐不論雙單月員外郎分發試用通判不論雙單月主事例銀均有長餘田兆馨擬請

以員外郎不論雙單月選用錢承俊擬請以運判分發試用朱椿擬請以主事不論雙單月選用際此上下交困籌款萬難之時所以勵人心風流俗者端在

聖主鴻慈激揚鼓舞庶海內慷慨慕義勇於爲善之士接踵興起而後數百萬災黎有起死回生之望事關數省安危所繫臣無任恐惶迫切籲懇

天恩俯照前奏

特降諭旨所有報効鉅款之劉承幹等九名准予所請獎勵臣民幸甚地方幸甚除查明各該員履歷造冊咨部外合將官紳報効鉅款懇請優獎緣由謹恭摺具陳

伏乞

皇上聖鑒訓示謹

奏 本月初八日奉

諭旨盛宣懷奏官紳報効災振鉅款請優獎一摺所有
報効鉅款之劉承幹等十一員均著照所請獎勵欽此

續撥皖省振款情形片

宣統三年二月

再准查振大臣馮煦電稱皖災成於去年夏秋至十月始請發急冬兩振舉辦既遲撥款又少以致各州縣無從措手相率觀望追奉

命查勘業已死亡相繼近且聞有人相食者又准皖撫臣朱家寶電稱皖北春振先後已撥二十二萬計連去年急振冬振工振已籌近五十萬金各屬官紳尙紛紛稟電請益現距接新期遠非再加恐難支持皖力拮据異常請設法救助再撥鉅款又據藩司連甲電稱皖災奇重勢頗延蔓振撫兼施殊乏善策災民流離四散省

垣屯聚亦多慘難言狀全省紳界公懇疏濬皖北皖南河道以工代振安輯流亡且免後患各等語此外印委紳商連篇電告筆難盡述臣每接一電晝夜傍徨百思不得一術以救此糜爛之局除先經籌墊振款八十萬兩業經查振大臣馮煦分撥各災區全數散放外現又竭力續籌二十萬兩採辦奉省高粱並擬再籌二十萬兩兌換銅元趕緊分運稍資接濟第恐災地太廣饑民太眾仍有未敷尙須另行設法幸上海華洋義振會道員沈敦和美國洋員福開森等勸募美國善會捐助麪粉五千噸三月初即可運解到滬臣已派遣員劉樹屏

並飭津浦南段鐵路局員段書雲分別火輪火車水陸接運得此大宗糧食略可分散所謂急不暇擇者也至江皖新捐照章不能減成故開辦至今所收捐款僅十三萬有奇加以報効銀兩計亦不過二十一萬餘兩杯水車薪緩難濟急現查防疫經費東三省向各國銀行息借二百萬兩直隸亦准籌借三十萬兩均議由新捐項下歸還近來民窮財盡虛名不足動人而官制議改觀望尤多數百萬鉅款一時不易籌措臣惟有督飭勸捐各員並咨函各省督撫臣及藩司等廣爲勸導涓滴歸公分濟兼籌勉支大局以期仰紓

宸廑所有皖省災情及續撥款項情形謹附片具陳伏乞

聖鑒謹

奏 本月初八日奉

旨盛宣懷奏皖省災情及續撥款項情形等語知道了
欽此

請援案緩徵江北災重各州縣本年上忙丁漕摺

宣統三年

三月 查振大臣馮會奏

奏爲江北災情與皖北輕重相等本年上忙應徵丁漕
籲懇

飭下援照皖省奏案緩至麥熟後再行察看啟徵以蘇
民困恭摺仰祈

聖鑒事竊

臣等遵

旨辦理江皖振務業將撥款散振一切情形先後分別
奏陳在案

臣

照周歷江北皖北各災區目覩災黎顛危

困苦實在情形較爲親切而地方敝政有關係於

國體民生之大者更不敢不據實直陳上冀

聖主之垂慈下救予遺之殘命伏維被災之區向無催徵之例本年春收尙無把握上忙應徵丁漕亟宜斟酌而災民當此饑饉能否獲慶更生卽在此冬春相接數月之間尤應體察實情優加撫恤倘任令各州縣書役照舊追呼不特民不能堪抑亦情所不忍臣照查皖省災重各屬業經撫臣朱家寶奏明將本年上忙緩至麥熟後再行啟徵已屬萬不得已而江省仍抱定剔荒徵熟辦法屢與該地方官面商大抵皆有初報成見迄未能允抑知去年旣災今年未熟從何而徵名爲剔荒徵

熟實則有徵無剔以去年秋成論原報海州熟八荒二
此次查振已及全境十分之七除荒者二成其五成災
區則仍不能免徵清河九分三釐查振亦及其半除荒
者七釐其四成災區則仍不能免徵所徵者爲荒爲熟
不待明言而江省通例各州縣先行裁串交書差徵收
當時卽欲分別亦恐不易其巧者更立徵大不徵小名
目舞文愈工明目張膽愈無忌憚災民百苦所領之振
錢能有幾何仍間接而歸之州縣雖州縣徵無不解但
旣未將災情據實具報又迫災民以所得振款爲完糧
之用揆之事理未可謂平臣宣懷復查此次兩省災情

深重中外咸知地方官狃於初報情形未敢先後兩歧
遂至有荒者自荒徵者自徵之弊一誤再誤誠堪痛恨
查今春迭接江皖各員董稟報有冬振查係次貧現已
變成極貧沿途鬻兒賣女流離悽慘筆不勝書加之糧
價奇昂斗米千錢粥廠搶食老弱溝壑救不勝救臣陸
續籌撥振款連採辦糧食共計一百四十萬兩華洋義
振會美國所捐頭批麪粉已抵上海又續辦糧食其值
不下數十萬圓洋員親往各災區調查施放寄來災民
照片其慘萬狀設竟一面放振一面催徵旣於政體自
相矛盾更何詞以對外人並聞人言饑民不得振則凍

餒死得振則逼勒完糧亦死儻若鋌而走險一旦借用
兵力則民之死者愈多而糜款更不可勝計臣等往返
電商同深焦灼惟有籲懇

天恩俯准援照皖省奏案將江蘇省所屬徐州府之邳
州睢甯宿遷淮安府之安東清河桃源及海州沐陽贛
榆等州縣本年上忙應完丁漕一律緩至麥熟後由該
省督撫臣察看情形實在能否啟徵再行

奏明請

旨以廣

皇仁而重民命出自

高厚鴻慈所有江北災重各州縣應徵本年上忙丁漕
請撥案緩徵緣由謹合詞恭摺具陳伏乞

皇上聖鑒訓示謹

奏 本月初八日奉

旨

請免振糧釐稅片

宣統三年三月

再江皖豫三省災區振糧缺乏附近各省近年此豐彼歉米價均甚昂貴惟訪聞奉省所產高粱上年尙屬豐收價亦較廉自應派員趕緊購運接濟民食查向章凡購辦振糧均可免完釐稅此次三省災歉款絀用繁較尋常振務更爲緊急擬卽由臣電商東三省督臣錫良並派員攜款分赴各處採辦高粱十萬石爲限制卽由輪船轉運鎮江浦口再行接運江皖災區悉交馮煦分別散放庶幾華洋義振不致專美於前相應請

旨飭下稅務大臣及奉天兩江督撫臣轉飭經過關卡

一體遵照所有此次購運辦振高粱十萬石爲限應繳釐稅憑臣護照驗明准予免其照章完納以節振需而利進行謹再附片具陳伏乞

聖鑒訓示謹

奏 本月初八日奉

旨盛宣懷片奏採辦振糧請免釐稅等語著依議欽此

擬定美英德法四國銀行借款合同摺

宣統三年三月
外務部度支

部會奏

奏爲擬定美英德法四國銀行借款合同請

旨核遵恭摺仰祈

聖鑒事竊

臣

載澤於宣統二年七月間面奉

諭旨由度支部借一鉅款舉辦要政當由

臣

載澤等會

同幫辦幣制大臣盛宣懷與美國資本家商借金款專
爲整頓幣制及東三省興辦實業之用於上年九月二
十七日具奏議借美款先訂草合同六條一摺奉

旨依議欽此欽遵復與美國資本家按照草約所訂各

事直接議詳細條款原議本由美國摩根公司昆勒貝公司第一國立銀行國立城市銀行合一美資本家承辦此項借款嗣因美商復欲聯合英國匯豐銀行德國德華銀行法國匯理銀行一同辦理集資較易而於辦事宗旨亦無窒礙本年正月初七日又經臣載澤面奏當蒙

允准照辦惟該四國銀行開送條款比較去年所訂草合同要素甚多殊難遽允經臣載澤等竭力磋商并隨時與外務部妥籌辦法不厭求詳茲已擬議合同二十一款其大要此項借款名爲一千九百十一年大清政

府整頓幣制及興辦實業五釐遞還金鎊借款卽爲畫一幣制及興辦擴充東三省實業事務之用總數一千萬金鎊利息五釐折扣九五還本以四十五年爲期由發售債票之日起第十一年始還本每半年一次如在立合同十五年後二十五年以內欲全還或於分期應還數目之外另還若干則每百鎊須加付二鎊半至二十五年後卽無須加價所有應還本息由度支部按期撥付指定以東三省菸酒稅出產稅銷場稅各省鹽餉新加價四項每年共庫平銀五百萬兩爲頭次抵押如屆期不敷交付應還之本利先將東三省他項餉源補

足如尙不敷再用他項補交自合同簽押之日卽將幣制用款及東三省用款兩單交與各該銀行在六箇月內籌畫一切一經該行知會度支部卽從速發行借票如東三省幣制局兩處亟須款項該銀行等允先各備一百萬金鎊聽候提用按週年六釐起息俟第一次債票發售後卽將此款連息一併交還以後售票所得之款由各該銀行歸入大清政府整頓幣制振興東三省事務兩項存候度支部知照匯款來華之後再給與撥款憑單聲明該款爲何項支用其格式須照幣制局東三省用款兩單開列再由該銀行撥交指定之中國銀

行或各銀行其四國銀行因合同第十款所定無匯兌之利益又無他項合同所予購料扣用之好處是以允於售票首次所得之款扣支七萬五千鎊以作酬費並聲明合同由度支部欽奉

諭旨允准簽字並由外務部用正式公文照會美英德法駐京大臣等語以上各款籌商數月實已無可再商較之近年借款合同及四國銀行原開條款受虧已少臣等再三審度意見相同並由外務部派員將漢文英文詳細覆校無訛謹將擬訂合同二十一款附函三件單二件併繕四單恭呈

御覽應否卽由度支部

臣

簽字蓋印請

旨遵行所有擬定美英德法四國銀行借款緣由理合
恭摺會陳伏乞

皇上聖鑒訓示再此摺係度支部主稿會同外務部辦
理合併聲明謹

奏 本月十七日奉

旨

各省官紳報効振款仍請照案優獎摺

宣統三年三月

奏爲各省官紳報効災振鉅款籲請仍照前案

准予優獎以資觀感恭摺仰祈

聖鑒事竊

臣

於宣統三年三月初八日具

奏報効災振鉅款懇請優獎一摺本日欽奉

諭旨所有報効鉅款之劉承幹等十一員均著照所請
獎勵等因欽此仰見我

皇上軫念災黎有加無已至意曷勝欽感

臣

遵卽電傳

各省宣布

殊恩以冀聞風響應踴躍輸將俾振款藉資接濟災黎

其沐

生成茲接雲貴總督

臣

李經羲暨江西湖南山西各省

司道委員先後電稱據雲南附貢生道銜楊寶瑛報効
振捐銀一萬兩江西試用知縣馬獻廷報効振捐銀九
千兩署湖南永綏直隸廳事株洲同知董鴻勳報効振
捐銀六千兩雲南箇舊同知李良年報効振捐銀七千
兩知府銜孫竹材報効振捐銀八千兩丁憂留黔補用
知縣李光炎商科舉人郵傳部郎中趙之駒同知銜蕭
恩榮沈德馨郭應培各報効振捐銀七千兩選用員外
郎李鯤元分發鹽運副姜鴻頤郎中銜周子祐楊寶恆

主事銜方豫王澤銘吏部拔貢詢問班八品錄事趙昌
燮府經歷職銜李國榮同知銜孔繁恭黃佑祥黃兆祥
州同銜陳文蔚各報効振捐銀五千兩同知銜彭爲楨
報効振捐銀六千兩其計報効振捐銀十四萬一千兩
均已如數核收由籌振公所稟報前來臣查江皖豫三
省災區正當春振緊急之時先後籌墊振款一百四十
萬兩均已解交查振大臣馮煦分撥散放並由臣派員
購運振糧源源接濟昨准馮煦自鳳陽來電苦雨兼旬
春荒又兆宿州一邑災民二十七萬餘口每口給錢八
百卽須二十二萬有奇懷遠渦陽五河泗州以人得千

錢計之均苦款絀且災重之區四月尤急擬俟大振放
後擇其尤困者再放急振一次而撥款已罄非加籌鉅
款不能救人救溺又接馮煦自南京來電頃得皖北報
告月初連雨淮水出槽下爲蚌埠鐵橋所阻致潁上至
懷遠一帶匯爲巨浸春荒已成現已派員往查並稱所
歷災區盜風日熾東南一隅恐釀巨患各等語臣每次
辦振深知春振較冬振更急災民餓斃凍斃亦每於交
春後爲多第籌墊之款均已全撥新捐所入爲數無幾
倘天未厭禍春麥更不能收恐拯救無此鉅款而饑寒
爲盜乘機竊發更屬防不勝防臣與馮煦往返電商不

遵寢饋幸得各省官紳勉力報効集成鉅款暫救眉急不但活人無算亦可藉弭盜患自應援照前案從優

奏獎方足以爲急公好義者勸查楊寶瑛馬獻廷董鴻勳報効銀兩核與報捐雙月選用道員例銀有餘均擬請以道員雙月選用李良年報効銀兩核與報捐雙月道員並免離任例銀有餘擬請以道員在任候選孫竹材李光炎報効銀兩核與報捐雙月選用知府例銀有餘孫竹材擬請以知府雙月選用李光炎擬請俟服闋後以知府雙月選用趙之駒報効銀兩核與報捐知府分發試用例銀有餘擬請以知府分省試用蕭恩榮沈

德馨郭應培報効銀兩核與報捐雙月直隸州知州例
銀有餘均擬請以直隸州知州雙月選用李鯤元報効
銀兩核與報捐分部郎中例銀有餘擬請以郎中分部
行走姜鴻頤周子祐楊寶恆報効銀兩核與報捐雙月
選用郎中例銀有餘均擬請以郎中雙月選用方豫王
澤銘趙昌燮報効銀兩核與報捐分部主事例銀有餘
均擬請以主事分部行走李國榮報効銀兩核與報捐
不論雙單月主事例銀有餘擬請以主事不論雙單月
選用孔繁恭黃佑祥黃兆祥報効銀兩核與報捐不論
雙單月選用同知例銀有餘均擬請以同知不論雙單

月選用陳文蔚報効銀兩核與報捐雙月選用同知例銀有餘擬請以同知雙月選用彭爲楨報効銀兩核與報捐不論雙單月選用知州例銀有餘擬請以知州不論雙單月選用以上各員所請獎勵按之籌餉例定銀數詳細復查實係有盈無絀合無仰懇

天恩俯照前奏仍准

特降諭旨所有此次報効鉅款之楊寶瑛等二十三名均予如請獎勵感荷

聖慈尤無旣極除飭取各該員履歷造冊咨部外所有各省官紳報効鉅款懇請仍照前案優獎緣由謹恭摺

具陳伏乞

皇上聖鑒訓示謹

奏 本月二十八日奉

諭旨盛宣懷奏各省官紳報効災賑鉅款籲請准予優獎一摺所有報効鉅款之楊寶瑛等二十三員均著照所請獎勵該部知道欽此

士民捐助振款請予建坊片

宣統三年三月

再士民捐助振款至千兩以上者例得請

旨建坊給予樂善好施字樣歷經辦理有案查江皖豫三省災振需款甚鉅茲據浙江蕭山縣紳士四品銜分部主事湯瑞霓瑞義遵其故父三品封典內閣中書湯懋功故母三品命婦湯陳氏遺命捐助銀一千兩撥充振濟要需由查振大臣馮煦咨請具

奏前來臣查所捐銀數核與建坊之例相符洵屬情殷施濟有裨災區相應仰懇

天恩俯准分部主事湯瑞霓瑞義爲其故父三品封典

內閣中書湯懋功故母三品命婦湯陳氏在於原籍自行建坊給予樂善好施字樣俾昭激勸謹附片具陳伏乞

聖鑒訓示謹

奏 本月二十八日奉

旨又片奏士民捐助振款請予建坊等語著依議欽此

簡授郵傳大臣謝

恩摺

宣統三年四月

奏爲叩謝

天恩恭摺仰祈

聖鑒事本月初十日內閣奉

上諭內閣總協理大臣業經簡授其各部行政長官有
應同負國務責任者應卽同時簡授盛宣懷著授爲郵
傳大臣所有內閣總協理大臣及各該大臣均爲國務
大臣等因欽此跪聆之下欽感莫名伏念臣世受
國恩躬膺

宸眷握交通之要政建樹無稱改貨幣之成規借籌鮮

效茲復渥承

寵命俾贊

新謨既仍畀以郵傳並勉擔夫

國務

臣惟有勤思職守殫盡愚誠夙夜在公效隆露輕

塵之報稱舟車所至冀梯山航海以尊親庶竭衰庸藉酬

高厚所有

微臣

感激下忱理合恭摺叩謝

天恩伏乞

阜上聖鑒謹

奏 本月十一日奉

殊批知道了欽此

愚齋存彙

卷十六

畢

愚齋存彙卷第十六終